

Apuch ue boune lègue de cami brigade peniu, quasi planè, que troubam la chourrère de la « cueva » qui sort en dus sauts perilhous toute blanque d'escume de û gran trauc nègre coume la gule dou loup. Entan qui espiabem l'aygue à brouni, toute gauyouse de trouba-s à la luts dou die, û omi qui abè l'ayre coum cau que-nse demanda si èrem francèses. Que hém u sautet, tant chic éense atendèm labets à trouba coumpagnie. Lou médye Ramon de Huesca, qu'ère pla brabe omi, e dab et que hem dab gay beroy tros de cami. Que-nse hé las aunous de la famouse chourrère de la « Cueva estrecha » qui da la trémoulère sounque per l'arrut esbariable de qui hè. Que la bim en permères d'en bach à brouni coum u demoun enfuriat. Que parech, premude enter dues roques hautes qui sémblen boulé estanga-la hens la soue courrude. Labets que tume tant hort à drète e à esquèrre de que reboumbech en proube fine e leuyère, apuch en u saut mayourau que s'esmouste aus noustes pès dab u brounit de tounerre chens fi. Lou sourelh qui tebiteyabe dens las dentelles de las roques que hasè esfeyts de luts qui yamey nat pincèu uma lou sabera escarni.

D'au soum enla, tout aude qu'ey lou cop de oelh ! La nuble qui bedèm à birouleya dau houns à trubès û array de sou qui l'aryentabe, que la bedèm aci à tourna puya à de capsus entan que las coulous de l'arcouli ey hasèn tourneya de taus ribans tant bèts de que nou gausabi mey muda-m, ni goayre bouha. Ey que cambièssi de coulou ? ey que demouressi trop loungtems à espia capbat lou pregoun de la cascade ? Lou medye que-m gaha lou bras enta ha-m recula !...

La puyade d'aquiu en la qu'ère prou male. Que calè la came lèste e lou bouhadé ségu enta segui aquet diable de « medico » Ramon ! Que-n anabe coum lou bent ! Toutu qu'entenèm de pourta haut las coulous biarnèses e, per arré au mounde, nau boulem parèche flagues ou minouses...